

續  
文  
獻  
通  
考

續文獻通考卷之二百五十三

皇明進士雲間王圻纂輯

仙釋考 名釋上

東漢

摩騰中天竺人明帝遣使往天竺訪金人因見摩騰要還中國於雒邑西門外立精舍處之遂譯四十二章經後卒于雒陽中國有僧自摩騰始

竺法蘭中天竺人與摩騰同入中國蔡愔所得西域經多蘭所翻譯

劉峻女明帝聽其出家此中國人爲尼之始

晉

竺法慧關中人入嵩山事浮圖爲師建元初至襄陽屢著神異之迹臨死語衆曰吾死後三日天當暴雨至期雨注城門水深一丈

阿羅竭莫詳氏族誦經二百萬言獨宿山野晉武帝時至洛陽時疾疫竭爲呪治多愈元康中止姜至山石室中去水甚遠竭以左脚碾石壁壁陷水出閹維之時焚爍累日屍不煨燼乃移還石室

耆域天竺人周流華夷惠帝時至洛一日至襄陽欲渡江舟人見其衣弊忽而不載比舟遠北岸域已渡矣前行見兩虎以手摩其頭虎弭耳而去騰末文兩腳彎屈域取楊枝拂水而呪者三即起行一日求去衆送至城外

域徐行追者不能及是日有從長安來者見域在彼賈人胡溫是日逢域于流沙計九千餘里

支遁平江人嘗往會稽能仁寺王羲之作郡遁往訪之因與論莊子逍遙篇遁作數千言才藻新奇如花爛發羲之披襟解帶留連不能舍

陳惠度幼爲獵士射鹿於嵎縣剡山鹿孕而傷旣產以舌舐子旣乾而死惠度大悟遂投寺爲僧

竺法太東莞人少與道安同學雖才辯不逮而姿貌過之領軍王洽東亭王珣太傅謝安並敬重之臨亡數日語弟子曰吾將近矣以太元十二年卒

支曇蘭青州人少蔬食樂禪誦經十三萬言大元中憇始

豐赤城山有人著幘稱休斯王同夫人男女等二十三人乞受歸戒蘭即授之受法竟觀錢一萬客二罷辭別而去聞鳴笳動吹響震山谷

慧遠姓賈氏雁門樓煩人晉時隨沙門道安南遊遠見廬山清淨乃以杖叩地曰若此中可棲當使朽壤抽泉言畢清流溢出遂建龍泉寺遠居匡阜三十餘年不出送客以虎溪爲限與陶潛及雷次宗劉程之等結爲蓮社桓玄令僧拜君親遠著論五篇言其非年八十三無疾而逝有匡山集三十卷行世

湖沙門支恭明晉元康中譯佛經維摩法華三本

道生法師入虎丘山聚石爲聽徒講涅槃經至闍提有

性處曰如我所說義契佛心否石皆首肯之

昔明姓張臨淄人時誦法華維摩二經有別衣別坐未嘗  
混雜嘗見晉賢乘象至其前又善神呪所救疾皆愈宋  
孝建中卒

沙門于法開最工醫術

佛圖澄天竺人姓帛氏誦經至數百萬言晉永嘉間入中  
國息于潞城能役使鬼物以麻油雜胭脂塗掌千里外  
事皆徹見掌中其左乳旁有一竅通徹腹內嘗塞以絮  
至夜欲誦經則拔絮一室洞明或至水邊引腸洗之還  
復納入今縣有洗腸泉即其遺迹又能聽鈴聲之吉凶  
石勒常據以出師勒始試以道術澄取鉢盛水燒香呪

之鉢中生青蓮花光色曜目石勒子暴崩澄取楊枝沾  
水洒之遂活勒由此信之號大和尚死後有人見于流  
沙石虎疑其不死餐墓視之惟見一石虎曰師莽我而  
去矣未幾虎死

僧涉西域人符堅時入長安虛靜服氣不食五穀日能行  
五百里言未然之事驗如指掌能以秘呪下群龍每旱  
皇常使之呪龍請雨俄而龍下鉢中天輒大雨堅及群  
臣親就鉢觀之卒于長安後大旱移時堅嘆曰涉公若  
在豈至此乎

鳩摩羅什天竺人西域諸國咸伏其神雋符堅遣呂光伐  
龜茲獲之見其年齒尚少強妻以龜茲王女距而不

辭甚苦乃飲以醇酒同秘室遂妻之光父子俱沒姚  
興迎事之待以國師之禮使沙門僧敷等八百餘人咸  
受其教羅什乃出經論凡三百餘卷又爲興著實相論  
二卷忽於高座謂興曰有二小兒登吾有慾障須婦人  
興乃召宮女進之一交而生二子遂以妓女十人逼之  
令受諸僧多效之羅什聚針盈鉢引諸僧謂之曰若能  
見效食此者可畜室因舉匕進針與常食不別群僧  
愧服乃止死於長安興於逍遙園依外國法以火焚尸  
惟舌不爛羅什譯經時布沙門道那僧畧道欄僧摩曇  
影等共相提挈發明幽致

法師道碧以奉律精苦爲秦王所重時僧尼萬數頗多愆



灑以碧爲國僧正綱領之給與吏力資侍中秩傳詔羊車各二人僧有官自碧始

法師道融時師子國有婆羅門獻其書至闕中乞與僧辨論羅什謂道融曰子可以當之融乃密使人錄其書目一覽卽誦尅日議論秦王與公卿大集婆羅門以能博觀爲誇融數其目并秦地經史三倍之什乘勝嘲曰卿小聞秦地有博學者乎於是婆羅門再拜融足下而去法師道融知事後母以孝聞母亡去爲沙門秦王欲官之堅不從命

沙門曇霍不知何許人禿髮僂僂時從河南來持一錫杖令人跪曰此是波若眼奉之可以得道時人咸異之咸

遺以衣服受而投之於河後還本主衣無所污行步如  
風雲言人死生貴賤皆中人藏其錫杖大哭數聲閉目  
湏臾起而取之人莫能測每謂僂檀曰若能安坐無爲  
則天下可定如窮兵好殺禍將及已僂檀不能從僂檀  
女病甚請療曰死生自有定期聖人亦不能轉禍爲福  
曇霍安能延命耶固請之時後宮門閉曰急開門則生  
竟門不及開而死後兵亂不知所在

宋

杯渡不知姓氏常乘大杯渡水往來京師或遇盛寒穴冰  
而浴或著屐登山或跣足市中荷一蘆圖造延賢寺置  
地上有怒者移之盡力不能舉杯渡食畢自挈之而去

笑曰四天王時有童子竊見圖中有四童子眉目如畫及追之失所在宋元嘉三年入東行至赤山死還葬覆舟山蔣之奇傳云杯渡自建康徃南州依陳氏繼聞建康復有杯渡陳氏父子五人徃觀乃留二人守三人還南州驗之杯渡乃在其家今寧國行廊山有盤巨人跡相傳梁杯渡師之遺其人不修細行飲酒食肉與俗不殊此稱梁杯渡師則梁時尚存

道士道人彭城人宋世名僧爲沙門法大弟子幼而聰悟年十五便能講經及長有異解立顯義時人推服元嘉十一年卒於廬山沙門慧琳爲之誄

求那跋陀羅天竺僧也至金陵神情爽邁文帝見之大悅

命居祇桓寺。跋陀以曉華言求諸觀音夜夢神力士易其頭。旦起猶覺痛甚。遂遍曉華言爲衆講解。

沙門道徽。孝武詔爲新安寺法主。敷宜有緒。甚允時望。

法師寶亮。居中興寺。中書袁粲見而異之。以書抵其師。道明曰。比見亮公。非常人也。日間所未聞。不知歲之將暮。僧道京兆人也。初爲姚興。欽重。出入同輩。後宋孝武悅其賢。躬爲壽春立光山寺。勅開講首。

齊

玄暢。金城人。少爲胡虜所獲。其師曰。此兒目光外射。非凡童也。遂釋之。乃往涼州出家。復避虜。達於揚州。洞曉經律。深入禪要。言禍福無有不驗。遊成都大石寺。入齊后。

山結草爲庵弟子見神人乘馬繞山一匝指示造塔之處乃建刹焉齊太子遣使徵迎曰吾教盡矣至京而卒趙僧嚴齊武帝時人棲遲青州山谷間常以一壺自隨一日謂弟子曰吾今日當逝壺中錢一千以通九泉之路爍燭一根以照七尺之軀至夜而亡時以爲知命

僧遠居鍾山寺老病坐床齊高祖將請床下見之房閣狹不容輿蓋遂遣使勞問而去遠山居澗飲凡五十餘年天下高其行

沙門曇超居錢塘靈苑山富陽大旱超至赤庭山爲龍說法即大雨

梁

寶誌金城人東陽民初朱氏之婦於上巳日聞兒啼鷹巢  
中梯樹得之舉以爲子七歲出家長修禪業止江東道  
林寺面方而瑩徹如鏡手足皆鳥爪言若識記以剪尺  
拂子掛杖頭負之而行經聚落兒童譁逐之或微索酒  
或累日不食嘗求食鱸者分啗之而有輕薄心誌即吐  
水中皆成活魚或一身三處宿焉齊武惠其感衆收付  
建康獄而誌游市井自若也帝乃迎至省中而誌又行  
道於顯陽殿及視之身如塗墨後入華林園忽著三重  
布帽以見俄而帝崩文惠太子豫章王相繼殂梁武即  
位下詔曰誌公神遊冥寂勿禁出入嘗與白鶴道人爭  
瀟山麓帝以二人俱靈通俾各以物識其地已而鶴飛

至麓忽聞空中錫飛聲遂卓於山麓鶴止他所皇子生誌曰寃家亦生後知與侯景同日也天監十三年無疾而終元天曆中累加號道林真覺慧威慈應普濟禪師邵碩本康居國人大口醜目狀如狂小兒得侮慢之時時從酒徒入肆酣飲後爲沙門號碩公與寶誌最善游益州以滑稽勸人行善家家喜之將亡謂沙門法進曰願露骸松下兩脚湏著屐進諾之已而失尸所在俄有自郫縣來者曰昨日見碩公著一屐行市曰爲我語進公小兒見欺止與我隻屐進驚問沙彌荅曰昇尸時一屐墮行急不及繫也

法聰南陽新野人八歲出家至襄陽傘蓋山白馬泉築室

以居梁晉安王來都襄雍乃造禪室見堂內有虎聰以手按其頭即閉目伏地時境內虎災聰即入定須臾十七大虎至聰命弟子以布繩繫頸而去自是無害又見白龜就聰手取食曰此雄龍也遇屠者驅猪百口即時散解因斷殺業所居夜放光明不假燈燭年九十二端坐而化

法師法雲有譽當世雅爲昭明太子所敬儒釋兩優爲天下第一

沙門惠皎居會稽以贊唱所撰名僧傳頗多浮汎因著高僧傳十四卷始漢末平至梁天監九二百五十有七人附見者二百餘人



僧朗嘗誦法華每出一狗一猴隨之日乞得飲膳即置木  
盂中食畢以其餘飼猴狗善作龜藏或時手足頭頸  
俱縮不見又嘗登舟初無篙力舟自汴流而上

法師道英初隱太行山禪宴樹枝葉結如蓋覆之後行龍  
臺澤觀游魚愛之即解衣入水坐深淵七日而出又嘗  
隆冬觀嚴冰愛其瑩徹就卧其上信宿而起晚居蒲州  
普濟寺一日講起至真如門庵爾氣絕衆意其逝矣有  
都講識之曰此入滅盡想耳三日必甦果然 時有達  
禪師得水觀三昧每入定清水滿室沙門道遷從達遊  
得火光三昧所居之室玄夜大明

尚圓廣漢人出家以呪術收物梁武陵王蕭紀宮中多鬼

魅諸綵女請圓持呪除之圓入宮安坐告曰爾輩小家  
鬼何敢入王宮可聽我一言於是諸鬼合掌住立圓即  
發呪南無佛吽鬼皆失所在武帝大加賞賚

智藥不知何許人天監元年泛舶至韶州曹溪水口聞其  
香樹嘗其味曰此水上流有勝地遂開山立禪寶林曰  
此去百七十年當有無上法寶在此演法即六祖此南  
華也

雙林大士義烏人姓傅名翕法號善惠梁普通間遇北僧  
普頭陀語曰爾彌勒化身今自鑑於水乃見圓光寶蓋  
即悟前因又常見釋迦金粟定光三如來放光襲其身  
喜曰吾得首楞嚴三昧即棄田宅賣妻子得錢五萬頭

陀復指示松山之頂雙椿樹大士因以錢剏寺而居故  
曰雙林有偈曰空手把鋤頭步行騎水牛人從橋上過  
橋流水不流武帝召至闕問從來師事何人荅曰從無  
所從來無所來師事亦爾至陳大建三年寂

惠約法師卒武帝輟朝三日素服哭之葬誌公塔之左方  
受戒者四萬八千人皆總麻哭送至塔嘗所乘青牛垂  
淚悲鳴及雙鶴繞塔哀唳彌日而去

三藏真諦天竺僧也梁元帝承聖元年將歸天竺府州刺  
史歐陽頎延之制正寺頎子紇居別墅在河渚間諦每  
訪紇以坐具敷水面跏趺其上飄然往還坐具畧不濡  
潤或不敷具即折荷葉而濟好事者多圖畫祀之

僧通梁時道人不知其姓侯景僭位通取肉楹鹽以進景  
曰太鹹通曰不鹹則爛及景死以鹽五斗實腹中送建

康市

陳

智顗姓陳氏荊州人一日潁川人七歲聞誦法華便能記  
憶謁大蘇山思禪師思一見即曰昔靈鷲山同聽法華  
今復來矣即示以普賢道場說四安樂行師入觀三七  
日身心豁然思曰非汝弗證非吾莫識又曰汝於陳國  
有緣顗即詣金陵隨處闡化嘗夢登高山見一僧以手  
招之曰此天台山也遂往居天台北峯螺溪之上陳宣  
帝割始豐縣以供其費儲后以下並宗戒範賜號智者

大師嘗著止觀十卷緇流至今指爲天台教云

法僧寶璣陳宣帝命爲僧統綏禦有法四衆安之屢入重雲殿講道帝尊之爲師初梁魏間僧統盛飾伏具僭擬府官至璣素罷之每出從數頭陀杖笠而已於時海東十二國皆求其畫像及卒法師曇衍繼之亦有重名衍生下四十齒具舉世異之

北魏

沙門常山衛道安性聰敏日誦經萬餘言研求幽旨慨無師匠獨坐靜室十二年覃思構精神悟妙蹟以前所出經多有舛駁乃正其乖謬常至鄴候佛圖澄澄見而異之澄卒中國紛亂乃率門徒南遊新野欲令玄宗所在

流布分遣弟子各超諸方法汰詣揚州法和詣蜀道安與慧遠之襄陽道安後入秦勸符堅致鳩摩羅什羅什亦承安令問謂之東方聖人或時遙拜致敬道安卒後二千餘藏而羅什至長安其所正經義與羅什譯出符會如一

沙門僧朗與其徒隱於泰山之瑤珞谷太祖遣使致書以繒素旃罽銀鉢爲禮今猶號曰朗公谷

沙門法果居趙郡戒行精至開演法籍太祖聞其名詔以禮徵赴京師後以爲道人統綰攝僧徒每與帝言多所愜允供施甚厚至太宗彌加崇敬永興中前後授以輔國宜城子忠信侯安成公之號皆固辭帝嘗親幸其居

以門小狹不容輿輦更廣大之年八十餘泰常中卒未殯帝三臨其喪追贈老壽將軍趙胡靈公初法果每言太祖明睿好道即是當今如來沙門宜應盡禮遂常致拜曰能鴻道者人主也我非拜天子乃禮佛耳法果四十始爲沙門有子曰猛詔襲其爵

沙門曇證年且百歲太宗幸廣宗邀見於路奉致果物帝敬其年老志力不衰亦加以老壽將軍號

沙門法顯慨律藏不具自長安遊天竺歷三十餘國同行惠景凍死道逢獅子呪之妥尾而去隨有經律之處譯而寫之十年乃于南海獅子國隨商人泛舟東下晝夜昏迷將二百日乃至青州長廣郡不其勞山南下乃出

海鳥是歲神瑞二年也其所得律通譯未能盡正至江南更與天竺禪師跋陀羅辯正之謂之僧祇律大備於前爲今沙門所持受

沙門法領從揚州入西域得華嚴經本定律後數年跋陀羅共沙門法業重加譯撰宣行於時

沙門曇摩讖尉賓人習諸經論於姑臧與沙門智嵩等譯涅槃諸經十餘部又曉術數禁咒歷言他國安危多所中驗蒙遜每以國事咨之神麤中帝命蒙遜令詣京師惜而不遣旣而懼魏威責遂使人殺讖讖死之日謂門徒曰今時將有客來可早食以待之食訖而使至時人謂之知命



智嵩天性悟爽篤志經籍後乃以新出經論于涼州教授  
辯論幽旨著涅槃義記戒行峻整門人齊肅知涼州將  
有兵役欲往胡地道路饑饉絕食積日弟子求得禽獸  
肉請嵩強食嵩以戒自誓遂餓死於酒泉之西山弟子  
焚其屍惟舌獨金色狀不變時人以爲誦說功報

沙門曇始於魏朝元會時振錫至宮門吏白太武曰趣斬  
之刃下無傷又白臨殿陛矣太武抽佩刀自斬之亦不  
能傷劒微有痕如線命收捕牧虎檻中虎皆俯伏左右  
請以天師試之虎即跑吼太武大驚延至上殿再拜悔  
謝

沙門惠始姓張家本清河人聞羅什出新經遂詣長安見

之觀習經典坐禪於白渠北晝則入城聽講夕則還處  
靜坐三輔有識多宗之赫連屈丐追敗劉義真時道俗  
咸見坑戮惠始身被白刃而體不傷衆大怪異言於屈  
丐以寶劍擊之亦不能害乃懼而謝罪統萬平惠始到  
京師世祖每加敬禮始自習禪至沒世五十餘年未嘗  
寢卧或時履泥塵足色愈鮮白世號白脚師大延中終  
於八角寺停屍十餘日坐旣不改容色如一遂瘞寺內  
真君六年制城內不得留瘞乃遷葬南郊外去死十年  
儼然不壞

沙門曇曜素有操尚爲恭宗所知禮佛法之滅沙門多以  
餘能自效還俗求見曜誓欲守死恭宗親加勸諭至於

再三不得已止密持法服器物不暫離身聞者嘆重之  
和平初更名沙門統自復佛法之明年由中山被命赴  
京值帝出見於路御馬前嚙曜衣時以爲馬識善人帝  
後奉以師禮

沙門師賢蔚賓國人少入道東游涼城涼平赴京罷佛法  
時賢假爲醫術還俗而守道不改於修復日叩反沙門  
比丘尼惠香上谷郡人死於北山松樹下屍形不壞已歷  
三年士女觀者無慮千百有司奏聞時太和九年也

沙門道登雅有義業爲高祖眷賞恒時講論曾於禁內與  
帝夜談同見一鬼二十年卒高祖甚悼惜之詔賜帛一  
千疋又設一切僧齋并命京城七日行道

沙門踰陁西域人有道業深爲高祖所重詔於少室山陰  
立少林寺而居之公給承供時沙門道願惠覺僧慧  
紀僧範道弁惠度智誕僧顯僧義僧利並以義行知重  
又自世宗以來至武定未有惠猛惠辯惠深僧暹道銀  
僧獻道晞僧深惠光惠顓法營道長皆知名僧也

沙門靈遠不知何許人嘗言爾朱榮成敗預知其時又言  
代魏者當葛榮聞之故自號齊及齊神武至信都待以  
殊禮問其天文人事對曰齊當興東海出天子今王據  
勃海是齊地又太白與月並宜速用兵後罷道姓荆字  
次德不知所往

比丘耜特師名惠豐不知何處人飲酒啖肉語嘿無常逆

論往事後皆如言居涼州刺史宇文仲和請至州內歷  
觀廩庫曰何意畜官馬官物後朝庭擒仲和資財沒官  
周文遣書召之時齊神武寇玉壁擅特曰狗豈能至龍  
門神武果還侯景未叛東魏之前忽以柱杖頭刻獼猴  
令其面常向西日夜弄之又索一角弓牽挽之俄而景  
啓降尋復叛後周文崩丞相夫人與第二子薨皆逆知  
其兆

北齊

慧思衛岳禪師以大小乘定慧等法根引喻俾習慈忍行  
奉菩薩戒衣服率用布寒則加以艾北齊天保中駐錫  
光山慧思居院梵天寺

陳有台宗三祖惠思禪師姓李氏武津人梁僧惠海居衡岳及見師欣然讓之陳高祖徵至栖玄寺以大建九年寂

稠禪師北齊高帝召之將行峯巒振翼飛走悲鳴如是者三日而止既至降蹕迎候入宮授菩薩戒盡停五坊鷹犬及傷生之具禁境內屠殺帝欲沙門盡習禪觀稠諫不可而止後宣帝即位嘗謁稠稠床坐不迎帝啣之將復入寺按其不敬誅之而稠已預知出十里許迎候曰恐血汚迦藍故遠來就及耳帝懷然悔謝

曇顯不知何許人天保六年敕沙門與道士親自對技金陵道士陸靜修自梁入魏以術咒僧衣鉢及宮殿梁柱

皆震動而萬衆以道流爲勝帝顧謂上統曰佛門豈無人哉統曰方技小術儒俗鄙之乃令曇顯爲對顯令稠禪師衣鉢置地使呪之靜修并力作法逾時不能動帝勅取衣使十輩取之並不能舉顯即自取置梁上使呪梁柱亦不能動靜修乃氣沮

沙門稠禪師魏跋陀三藏之資也受具徃嵩山少林又抵覃懷王屋之栢谷寺有二虎方闔以錫校解之由是知名

名乳明元年寂於龍山雲門寺

兩稠禪師疑只一人佛通分載兩處事實不同今因之

周

惠遠與武帝抗論佛不可廢不從乃隱居楚澤青蓮山叢

道造涅槃等疏有擲筆凌空之驗

法師靜謐聞廢佛氏詔下求見武帝極諫禍福報應之事  
帝爲動容然終不聽復謫泣而退遁入終南山武帝欲  
官之謫徙入大乙使者不獲而返謫尋告弟子曰吾生  
無益於世將事捨身乃坐磐石留一內衣自條其肉布  
於石上引腸胃掛於松枝五臟皆外見餘筋肉手足頭  
面胷拆都盡以刀割心捧之而卒侍者歸山猶見捧心  
而坐餘骸並無遺血但見白乳流疑石次時年四十五  
任道琳以學業淹貫得近周武議論二十餘日酬酢七十  
番周武嘗許以復教及宣帝立道琳申請尤力從之

尼智仙河東蒲坂劉氏女也以出家有戒行長通禪觀時



言吉凶成敗事奇驗居般若寺會隋文帝生於寺方季夏盛暑乳母扇之帝寒甚幾絕不能啼左右大驚尼就視之曰無憂即舉之呼曰那羅延因以為小字抱詣太祖曰兒來處絕倫俗家穢雜不宜留請為養之太祖遂割宅為小門通寺以兒委仙視育後皇妣來抱忽見兒為龍驚墮於地仙失聲曰觸我兒令晚得天下及帝稍長仙密告之曰後汝大貴當自東方來佛法時滅賴汝而興及周武廢教仙隱於家內著法衣戒行愈篤後帝果來自山東為天子大興釋氏仙前此而卒

隋

竇公開皇中居真定解慧寺嘗齧石為柱作門三楹上為

樓坐卧其上後北虜來寇縱火焚至寺寶公從樓自  
毫髮無傷衆寇及之及目斷寇又舉火焚樓火自滅群  
寇驚駭稽顙而去

靈藏律師與文帝爲布衣交趨藏者極盛帝手勅曰弟子  
是俗人天子律師是道人天子有樂離俗者任師度之  
藏由是度人前後數萬

曇延蒲州棲岩寺僧也家世豪族宦周齊間延年十六身  
長九尺餘垂手過膝目光外射初聞講涅槃悟旨隋開  
皇間旱命延禱之甘雨大注遺啟云法王御世最荷深  
恩護持二寶終始莫二言訖而逝

閻那屈多西天竺人也文帝時至長安大興善寺奉勅譯

法華等經

僧融居九江東林寺嘗至江陵有一家崇奉神廟者見融禮之遂受戒奉佛後主人之母見一鬼欲縛之母懼請融誦經鬼怪遂息後融還廬山宿旅店衆鬼曰君何謂鬼神無靈乃曳下地欲殺之融默念呪語即見一天將執金剛杵擊之鬼驚散不見

舜智禪師居章洪山之南谷從稠禪師出家或時覺有妄念即以錐刺股後入贊皇山人奉米麵辭去不受曰山居橡栗自足禦饑也其簡易如此

道穆初入荊州神山忽風雷震吼蛇虎交侵穆心才有一動七日蛇虎遂隱山神變形謝過曰此由田伯玉也持

來受戒自是諸毒潛亡禱雨輒應居山三十餘年道俗  
欽德

惠越隋開皇中僧有戒行居羅浮嘗引虎枕其股今伏虎  
岩乃其宴息之所

胡璩姓常莒州沂水人仁壽初召送舍利於蔣州棲霞寺  
博好傳法所在追訪乃於江表獲經一百餘卷并前錄  
所遺及諸缺本隨得施利處處傳寫

僧世青州人住興善寺仁壽初召送舍利於萊州弘藏寺  
四年又勅送密州茂勝寺行達青州道藏寺夜放赤光  
從房而出直指東南夜密州城南又見光明從西北來  
透城内外朗徹如日及造石函忽變爲金如棗如豆間

錯函底餘處並變爲青礪礪因具圖表帝帝大悅世後還京卒

雲觀莒州人七歲入禪仁壽中勅送舍利於本州定林寺初停公館即放火光掘基八尺獲銅浮屠一枚彫鏤駭人乃用盛舍利恰得相容州民俞巨海者患癰六年聞舍利至自書請瑞見本三粒分爲三色如黃金乍沉乍舉及見三佛從空下即能陳述詞句如流觀還京都復委終事

法楷青

人禪後住揚化寺仁壽置塔奉勅送舍利於

利於

四日午時見佛半身白面如玉

舍利舉前佛頂之上黃赤花起二十九日夜降甘露赤

光遍於城上須臾流照達於塔所屢有花木樓臺變化著見楮具列聞帝大悅令圖示海外

明舜姓張青州人解慧連環世稱雄傑一夕夢冥官徵責福業舜荅講知度論并誦本文六十餘卷冥官曰講解浮虛誦文是實餘齡未盡早令放還旣寤遂專精已業以大業二年卒於京

法喜神僧也貌寢陋年若四十許嶺表父老咸言兒時見之語嘿不常然皆爲吉凶之兆煬帝聞其異召之俄一日統宮中遍索羊頭帝惡之以付廷尉手足銀鐐禁衛嚴甚喜日丐於市飲食自若有司以聞帝命按視封鑰如故及啟鑰視之惟見絮淡覆黃金骨骨皆連鎖遽以

白帝詔以香泥樹骨塑之是夕喜以泥像起行言笑如故遂釋其禁後命以熾炭炙死葬之香山寺側而喜復見於南海發其塚惟空棺而已及煬帝江都遇弑方悟索羊頭之意

唐

毗盧遮那不知何許人曾入毗山不知所終唐時現形山上遂於山下立祠祀之

王梵志黎陽人父德相有林擒樹生瘻大如斗瘻爛德相撒其皮見一嬰孩抱胎而出七歲能語問誰育我具以實告因名梵天後改曰志蓋菩薩示化也

灌頂唐武德中講經於仙居縣九旬山上有潭漁者甚衆

頂勸止之忽一夕風且視之則爲洲矣

慧滿唐貞觀間於大蜀山誦經二十餘年忽有白衣造門  
曰我東海王少子聞師誦經故此聽受時苦旱慧滿令  
其降雨荅曰水旱上帝司之若盜布天澤罪當殛死慧  
滿曰汝舍身救民我誦經救汝白衣唯唯而去須臾膏  
澤隨至白衣死於山慧滿收而葬之民爲立祠

法冲隴西成紀人幼而秀異遂發心出家入武都山修業  
唐貞觀初勅私度者處死於是僧多逃嶧陽山避難冲  
閱其餓詣州宰曰如有死事冲身當之但施道糧終獲  
福祐守宰嘉其烈乃濟之山有虎冲詣告曰今窮客相  
投可見容否虎皆去



法順長安萬年人亦稱杜順如晦族長也爲華嚴法師爲  
隋文帝所重月給俸供之有病者對之危坐少頃即愈  
生而聾者召之與言即聰生而啞者就與之語即能言  
或狂而顛者使人領往向之禪定少選即拜謝而去又  
嘗臨溪隨侍者懼不可濟順率同涉水即斷流其神迹  
類如此太宗素敬重之嘗引入宮禁妃主戚里諸貴奉  
之有如生佛集華嚴法界觀門弟子智嚴尊者傳其教  
玄奘緱氏人俗姓陳住長安莊嚴寺受諸經論一聞不忘  
後遍遊荆楊等州訪諸道鄰復還京貞觀間往西域取  
諸經像至罽賓道險不可過玄特閉室而坐至夕忽見  
老僧授以心經一卷令誦之遂得虎豹潛迹至佛國取

經六百餘部以貞觀十七年還令住金華翻譯經藏太宗親爲序論皇太子又著述聖紀以廣聖義時德初告門人曰有爲之法必歸澹滅泡影形質何得久住吾行年六十五必卒至期果然色貌如常葬於白鹿原初往西域取經時摩靈岩寺松曰吾西去可西長若歸即東向使弟子知之及去其枝年年西向一年松忽向東弟子曰吾師歸矣果然因號摩頂松太宗令以所歷山川風俗撰大唐西域記以遺後世

明淨高密人少出家後南遊天台日至村中化食回值群虎皆張口閉目若有饑相淨乃以匙挑飯納其口中明日化食回虎又如之人皆駭異貞觀三年早召淨至京

祈雨大獲甘霖海內有年乃度僧三千以酬之後還義勝寺莫測所終

志覺河東人博覽諸經以涅槃地論爲心要時以邑多虎暴都督張遜命覺禱之其患遂息貞觀中蒲晉旱覺曝烈日中二日湏臾大雨合境沾足

智永王右軍七代孫名法極住會稽佳祥寺常居閣上臨書三十年寫退筆頭置之大竹簾簾容一石餘五簾皆滿人來求書如市戶限爲穿穴因鉄罽之人謂之鉄門限智永弟智果亦名僧善書

惠寬落髮於龍懷寺神異日顯俗呼聖和尚

寒山貞觀中隱天台始豐縣西寒岩幽窟中時來國清寺

人以爲風狂之士或叫噪凌人或望空漫罵寺僧不耐  
以杖逐之翻身撫掌大笑豐干禪師謂太守閻丘胤曰  
寒山拾得即文殊普賢後身也閻丘往見之二人笑曰  
豐干饒舌耶寺僧皆驚曰大官何禮狂子閻丘復詣寒  
巖送衣物即縮入石穴縫衽無迹後僧道翹抄錄人家  
頌偈得二百餘首編集

拾得初豐干禪師見赤城道側兒啼乃携至國清寺稍長  
令知食量即對像盤飧復令滌器即斷竹爲筒投殘食  
於內寒山來必負去又護伽藍廟爲烏鳥取其供拾得  
以杖擊神首罵曰汝食不能護安護伽藍是夕闔寺僧  
夢神曰拾得打我一日驅牛曰此知僧事者即呼亡僧

牛各應之衆皆愕然偈辭附於寒山集中

三藏菩提流志南郡土國王子也讓位出家高宗聞其名召之以垂拱中至京師凡四十年如華嚴寶積等經皆出其手帝及重臣敬之如生佛卒年一百五十有六葬日特給函簿羽儀塔於龍門西原謚曰開元一切徧知

### 三藏禪師

三藏哲法師太原人母曹氏嘗夢日光滿室因有娠及生有過人之才名重當世武則天臨朝屢徵不起開元間示化於福聚寺

玄暉字述世洞貫三氏學嘗慨教藏及古今圖史之博而學者難以備究因撰法苑珠林一百卷各開門類識者

重其精博

道宣京兆錢吏部尚書甲之子武德中爲僧於南山爲律師乾封二年寂時衆見空中幡花交列異香天樂天人同聲請師歸彌勒上詔天下寺院圖形奉祀懿宗朝謚澄照所撰剛定僧戒本一卷比丘尼戒本一卷注僧戒本三卷戒疏四卷注羯磨經二卷羯磨疏四卷行事鈔三卷

萬回禪師姓張九歲乃能語幼致書於兄戎所路三千里朝往暮返故號萬回景龍中召入宮賜號法雲館於集賢院給二美人奉事未幾忽求闕鄉河水左右莫能得回曰第穴堂前地可得也既得之回飲水畢湛然而逝

賜號國師圖形集賢院初莊惠太子始生則天抱示之  
曰此西域樹精養之宜兄弟及安樂公主得勢曰曰血  
腥不可近又嘗撫玄宗背曰五十年太平天子睿宗爲  
相王每將出必告市人曰天子來少頃而相王王其神  
異類此

道岸不知何所人中宗召入宮爲妃主授歸戒因留禁中  
別日帝至諸師皆避席岸獨逡巡長揖而已帝高其量  
圖形於林光宮御製讚之時以爲榮

僧伽葱嶺北人龍朔中東遊長安南至臨淮宿賀玄濟家  
謂玄濟曰此故寺也玄濟因捨宅爲寺掘地得石刻果  
齊香積寺基中宗召見禱雨即應賜號國師及寂後六

著靈翼土人呼爲大聖云

金舌和尚趙人修道中條山延和間三召不至乃觀其舌  
以進睿宗命焚之化爲金舌夜哦經如故遂名金舌  
稠錫和尚桐廬人開元間卓錫南嶽庵前稠木自開嘗下  
山復歸庵衆不納一日偕二虎至僧衆怖走稠錫曰勿  
怖止欲決去留耳吾果不能住此庵虎當恣噉我如可  
再居統吾身三匝虎統行如數衆懼請止集衆五百遂  
爲大刹

一行魏州繁水張公謹孫自幼聰黠師事普寂禪師出家  
剃染於嵩山見高僧盧鴻文一覽成誦因窮大衍曆數  
得其精妙玄宗聞之召問曰汝何能對曰善記覽即以



宮人籍示之覽畢如素所習熟玄宗呼爲聖人漢洛下  
閎造大衍曆云歷八百歲當差一日有聖人出而定之  
一行當其期乃造大衍曆而正其謬卒謚大慧禪師帝  
嘗問國祚修短曰鸞輿有萬里之行社稷終吉帝驚問  
故不吝退以小金盒進之曰至萬里即開帝一日發盒  
視之蓋當歸少許及祿山亂駕幸成都至萬里橋忽悟  
未幾果歸昭帝初封吉王而唐以昭帝亡所謂終吉也  
有老嫗子坐罪求赦行日藏一豕於甕中呪之七日北  
斗盡滅帝以天變赦天下由是出一豕則一星 見七  
日而斗如故所著易論十卷大衍曆五十二卷七政長  
曆三卷釋氏繫錄大衍玄圖心機筭術括通甲十六局

六壬連珠歌六壬髓經六乙太乙經遁甲經各一卷五  
音地理經十五卷

道泓黃州人幼爲沙門與詩郎張敬之厚善所言吉凶無  
不驗嘗爲張說視宅見牖有三坎爻餘曰公富貴一世  
而已諸子將不終說懼請平之泓曰割他肉補瘡病無  
益也後說諸子汚祿山卒死

三藏金剛智西場人本王姓出家及來東土玄宗見之大  
驚詔於大慈恩寺嘗令新舊智經聖圖七俱胝像約開  
時即開闢三日像果開辟漸廣而雨所至必結灌頂道  
場弟子不空傳其教寂後賜謚灌頂國師

無畏三藏天竺人諱國出家玄宗嘗夢見之至果如夢館

西寧寺後令祈雨持鉢水以小刀攪之即有微物浮沉鉢面俄而大雨彌日又嘗令祈晴畏捏泥媼五軀作梵語呪之若斥罵者即刻而霽三藏言行龕易宣律師不悅常令宿於戶外律師中夜捫虱投床下無畏即呼曰撲殺佛子耶律師方知其爲異人也

牛雲不知何許人少不慧初至東臺見老人亟拜之老人憐其誠曰汝性昏迷胃中有淤肉在當爲汝鏹去之因戒雲閉目無輒開雲如約覺老人以鏹鋤其胃然不甚楚少頃心懷開豁頓異往時及開眸見老人現身爲文殊也

吉祥東川解廬寺僧也魁梧多力受飯五鉢日夜誦經

西池中魚知其數以名召之皆出水面使去即沒

真初因日本國沙門榮嚴普照等奉僧迦黎十領施中國高行沙門鑒真受其衣嘆外國人有佛種性欲往化之乃附舶而東爲惡風飄入魚龍等海以真律行高得脫禍既至日本彼主預知枉駕迎勞館於毗盧遮那殿未幾請真授歸戒夫人群臣皆以次受日本至是始有律教

玄朗居東陽之左溪凡三十年因號左溪每曰泉石可以洗昏夢雲松可以遺身世吾以此始亦以此終卒年八十有三

無漏新羅僧也玄宗一夕夢沙門身金色誦寶勝如來名

以問左右或對曰賀蘭白草谷有新羅僧名無漏者常誦此佛頗有神異帝乃召見於行在喜曰真夢中所見僧也遂與不空併留於行宮托以祈禱寂時令掌凌空去地尺許而逝欲歸葬舊谷送至懷遠縣下院輒舉不動遂以香泥塑全身留之下院

不空胡僧也居興善寺嘗至獅子國群象奔逸莫能禦之不空端坐路衢象皆頓止俯伏少頃而退玄宗於便殿令與方士羅思遠較術遂持如意向之言論次不空就取如意投諸地令思遠舉之思遠饒力不能舉帝擬自取不空笑曰三郎彼如意影耳因舉手中如意示之思遠欽服思遠罷凡禱必張繡座手持木神神能自立口吻

瞬動祈禱可奪造化朝野奉之如神

懶殘天寶初居衡岳寺爲僧衆執役性懶而食殘故名懶殘李泌寓衡嘗夜往見之懶殘方撥牛糞火煨芋出分芋食之曰慎勿多言領取十年宰相後果然號明瓚禪師

智儼柳之右姓曹氏子在孕不嗜葷成童不嗜戲生九年爲僧抱經笥入岫嶠從名師執業曹王臯鎮湖南請爲人師登壇三十八載得度者萬有餘人

懷素零陵人觀二王真跡及二張草書而學之書漆盤三面皆穴贈以歌者三十九人皆天下名流顏真卿作序李白歌有少年上人號懷素天下草書稱獨步之句

布毛侍者吳元卿也始爲供奉官求憲宗出家後謁鳥巢道林禪師辭去曰欲往諸方學佛法師曰若求佛法此中亦有少許於身上拈起布毛吹之遂悟號布毛侍者惠超定海人開元間居九峯山香栢巖草衣木食戒行精苦

全真柳州人至德初游湖之湘源創淨土院永州刺史常宙遣使禮請翌日即至四門各見其入宙出道迎惟見其一其神變不可具述卒年一百三十五五代時因全真多神異改湘源爲全州今其真身在湘山歷代封爲慈佑寂照妙應禪師

澄觀字大休會稽夏候氏子身長九尺四寸垂手過膝口

四十齒天寶七年出家肅宗時入內譯華嚴至德中以  
十事自勵謹守禪法嘗註經疏慶身爲龍矯首南臺尾  
蟠北臺識者以爲經疏流通之象又爲僧叡等著隨疏  
演義四十卷 文宗三年寂壽一百有二圓維舍利光  
明舌如紅蓮賜謚仍號清涼國師圖其像於大興唐寺  
曇一字覺胤姓張氏越州律師也大曆六年寂於開元寺

補闕梁肅製碑銘

崇惠不知何許人大曆九年道士史華以術得幸請立双  
梯與沙門角法帝率百官臨觀史華履双梯而上命惠  
登之惠蹠双而升徃復無傷惠乘勝命聚薪於庭舉烈  
焰惠入火聚呼史華令人華慚汗不敢正視帝大悅而



新修廬山志 卷之二十三  
三  
罷賜崇惠號護國三藏

員澤寓東都惠林寺與東都李源厚善偶相率游峨嵋山  
舟次南浦見婦人錦鎗負罍而汲者澤曰婦人孕已三  
稔遲吾爲子今既見之無可逃者三日後願公顧臨以  
一笑爲信至暮澤亡婦乳三日後往見之果軒渠而笑  
湛然禪師居於荆溪臨終告其徒曰生歟死歟其旨一貫  
耶與汝等談道而訣言訖化去翰林梁肅題其碑陰於  
止觀論序其次曰天台教始曰灌頂次曰縉雪威又其  
次曰東陽小威又其次曰左溪朗公其五曰荆溪

熙怡姓曹氏桂陽人爲廬山東林律師大德間卒年七十  
一時貞元十五年也許堯佐製其碑銘

高僧遺事

高僧不自知其年歲時人以師久

居名其所爲黃石若遜寺劉河有記

金地藏新羅國僧也至德間渡海居青陽九華山常以岩  
間白土雜飯食之人以爲異年九十九忽呼徒衆告別  
但聞山鳴石墮俄而趺坐於巖中誓三稔間將入塔顏  
貌如生昇之動骨節若撼金鎖焉

員覺大師姓李隴西人家於遂寧之長江師成都金和尚  
授以二訣大厯七年忽見端相身坐員光中遠近花木  
變成蓮華後端坐而化肖像事之謂之聖觀音

法證姓郭氏南嶽雲峯律師也貞元十七年示寂壽七十  
有八椰子厚銘其塔後爲之碑誌

凝公東都聖僧寺大師也貞元十九年嘗召至闕後歸淮南監察御史柳宗元作序送之

般舟和尚姓蔣零陵人居南嶽龍興寺貞元二十年寂柳子厚作碑銘

少康縉雲人十五出家從學諸方貞元中嘗至江陵遇一僧謂曰汝化緣在睦州已而不見康至睦州日乞食城中得錢誘小兒誦阿彌陀佛一聲遺一錢即高峯山頂建道場集齋念佛康獨聲高衆見佛從康口中出坐逝之夕有光燭烏龍山山色爲變白宋賜號廣道大師

大徹信安人姓祝氏貞元中行化闖越西安明果寺其道場也憲宗嘗召見問法至今有大徹禪師貶毛維瞻記

草衣禪師不詳所從來初與人析薪者過之於野中其形  
塊然與草木俱咨於州長延就茲地三十年州人不知  
其所以然遂以草衣號焉足不履地口不嘗味日無晝  
夜時無寒暑寂寞之境一繩床而已

大明律師姓歐陽氏天寶十一載始爲浮屠於南岳廣德  
三年始立大明寺於衡山詔選居寺僧二十一人師爲  
之首乾元三年又命衡山立毗尼藏詔擇律僧七人師  
應其收元十五年寂柳子厚製碑詞

吳法師居湘西其叔父官中丞鄭中書孟尚書皆以師  
友命之柳子厚有序送其行時鼎立而興者吳則惠誠  
荆海雲楚則重巽也

馬卽婦不知出處陝右俗不識佛婦至人見其單子都雅  
欲求爲婚婦曰吾不願財但能誦我所持經一夕而通  
者則歸之乃授以普門品至明誦徹者二十餘輩則曰  
可更別誦因授以金剛般若所約如故旦通者亦十許  
人乃更授以法華經七軸約三日通徹者定配之獨馬  
氏子得通乃令具禮迎歸客未散而婦卒遂卜地葬之  
未數日有老僧至自謂向女子之親訃馬氏問其由馬  
氏引至葬所開視其尸已化惟留金鎖子骨僧曰此聖  
者來化汝宜思善因免墮苦海以錫杖挑骨飛空而去  
自是陝右奉佛者衆

劉大師憲宗時騎白馬行村落中不知所從來人有病與

藥輒愈一日從鄉人鄭氏乞地爲室俄入林中趺坐而逝衆異之即其地爲寺

元嵩姓陶居丹陽雖從釋氏而心存孝友劉禹錫有送元嵩南遊詩序

雪山歙縣人少時遇盛夏輒幕伏草莽中以身施蚊蚋者二十年始住休寧普濟寺自號覺庵及坐滅茶毘頂骨不壞得舍利數粒所著有池陽百問一云懷義嘉陳氏子得法於雪竇住景德禪寺有百問行世叢林謂之池陽百問

俱見一統志

義了合肥人姓鍾雖嘗爲道士去從浮圖學名所居爲昨夢齋吳正伸贈以詩曰不受塵網縛祝髮趨幽屏回視

真夢事超然得深省寂然涵虛空夢覺等前境

白陽禪師臨川人號仙林姓王氏元和中出家於白陽院修行勤苦歲旱鋪地即泉湧出民得資以灌溉一日忽依鍾而化人推之仆地拆齒屍自起立里人投其屍於水三日遡流故處衆異之塑其骨而祠之祈禱多應

上弘姓饒氏撫州景雲寺律師也與匡山法真天台靈祐景門法裔興果神策建昌惠進等五長老交游而姜公輔顏真卿楊憑常丹皆與友善以元和十年化於東林精舍年七十七歲白居易爲塔銘

元浩不知何所人弘天台教嘗爲翰林梁肅撰涅槃經疏人以比王輔嗣易而與清凉華嚴疏抗衡焉

神清字靈叟北山和尚也高談著述有法華玄笈十卷  
氏年誌三十卷律疏要訣并俱舍訣等共百餘卷語錄  
十卷内外該括可爲世範受業於錦州開元寺終於梓  
州惠義寺時元和十五年也

無業禪師居於汾陽穆宗遣左階僧錄靈阜資詔起之業  
曰君可先行吾即往遂沐浴淨髮告同人惠愔等禪法  
端坐而逝師於憲穆兩朝三詔不赴謚大達禪師

光範爲童子時事靈祐師學道經記初居嘉興空王寺後  
居靈光寺與其徒講贊數言言流會歸之說自吳南北  
郡邑咸來受法人人自得著釋會章句十五卷

元布袋北庵禪師名景元永嘉人叅蔣山圓悟有得悟曰



我這裏禪道都被元首座作一布袋盛去了一時衲子  
遂呼爲元布袋

周南遂昌人號知常叟壯年放蕩游四方謝棄鄉里學仙  
不成去學佛以易成名

晉實獲府人幼不如輦九歲即契僧語從通禪師居天寧  
寺携錫遍歷禪席曰不超三界非丈夫也自此節食毀  
形謁石鍾賢禪師隱板山習定一紀出遊衡岳憩圓通  
寺升座說法有天花亂墜白鶴祥空長沙大旱迎師祈  
之說偈曰往大雨隨至一日告門人曰辛未歲正月朔  
日吾將去及期端坐而化

法信豫章人寶曆二年自五臺山禮曼殊師太和元年在

應城縣西壽寧寺引利刃截右膝復截左膝門人奔持其乃白乳流出師遂涅槃其足緘藏寺殿宋慶曆中賜號靈濟大師

惠寂韶州湏昌人姓葉學佛有戒行開成中入柳州黃莽山見山神告以宜往袁之仰山惠寂行抵仰遂創庵以居後有僧乘空而下相講論大有契悟且示以貝多葉梵書仍騰空而去江西觀察使常宙奏請賜號

小釋迦韶州保昌黎氏子九歲出家遊禮瀉山五年得悟一日回鄉母以肉啖之曰不食則違母命於是食之即至小溪以及剝其腸洗滌尋入袁州仰山結庵僖宗賜號澄虛大師

心鑑華亭人姓朱氏母生時有異香稍長出家詣嵩岳受具戒大中間居洛陽長壽寺尋歸姑蘇再住明州棲心寺所在禪者雲集成通中示寂葬天童山賜號心鑑塔曰壽相

嚴陽尊者名善信天祐間杖錫游南昌居明心寺跏坐磐石常有二龍一蛇馴擾左右及後建塔于中宋淳祐間啓其塔髮垂至踵指甲過臍

三刀禪師唐末居廬江顯寧寺黃巢之亂爲賊所執斫之三刀無血故號三刀禪師

海印泰安州人居鄒縣大明禪院幼悟道常夢異僧指示一旦呼弟子謂曰吾幻身不堅非久住世親書偈畢端

坐而化三日慈容如生其院上紫霧貫於天際邑令見之嘆為真佛

雲定平山人生而異常長乃出家每日法離文字豈可溺於筌蹄遂遊歷四方聞葉縣方城之東有名刹曰普嚴乃得遺趾募緣重建緇流爭歸之預知圓寂其徒建塔刻銘以紀其實

李長者名通玄唐宗子自滄州來孟縣日惟食十棗一栢葉小餅掩室著論無虛時後至冠蓋村逢一虎馴伏長者語虎曰我欲釋華嚴經可為我擇一棲止處虎遂起引至神福山得一龕居之以著論常有二女子為汲泉炷香奉紙墨具淨饌畢即引去莫測所之如是五載長

者著論畢年九十卒于龕中

一新羅漢潼川舊無鹽井一新遊蜀至此指其地鑿之鹹泉湧出因置寺奉其遺軀

扣冰和尚崇安人名藻光出家叅雪峯真覺師在瑞炭院前有溪遇冬輒扣冰而浴

子薰隱興化囊山高岩下趺坐浹旬不食誦經口吐異光或臨水餞蛭或袒露施蚊行則二虎隨之因號其庵曰伏虎兀坐正覺常指之曰辟支佛化身也黃滔有詩咏

曰廬外曾馴虎堂中舊兩花

傳燈錄名文矩

僧寂名耽章年十九入靈石山南平鍾王嘗盡禮致之不赴但書付使者曰摧殘枯木倚寒林幾度逢春不變心

樵客見之猶不採郢人何事苦搜尋

慧元姓倪氏潮州人削髮至京師有法嚴圓明法師者見而異之臨終升座說偈曰五十五年夢幻身東西南北執爲親白雲散盡千山外萬里秋空月正明

道安雲南大理府何賧人唐時蒙氏據其地道安自幼嗜佛書爲僧于天長寺精脩苦行嘗欲于寺建浮圖卽有洪水自蒼山漂木石而至羅篋島有毒龍頻覆舟道安創寺其所害遂息其他神用莫測坐化之夕毫光五采茶毘之日頂骨有唵室利伽訶阿六字梵書人始知爲文殊之化以寶瓶盛其靈骨化爲清水云

道清姓張滇人殉道忘軀日課經典感現觀音大士遐邇

欽風漁者焚網酒家墮具皆以利物爲心國王蒙孝桓  
冊爲顯密融通大義法師一日微哂而化火中彩雲磅  
礪舌根不壞如紅蓮

脫空諱覺胤戒律高潔母亡廬墓累墳刺血書經住錫五  
臺嘗遊滇池築一庵名樂道後歸五臺沐浴焚香而寂  
三日面如生流汗津津異香馥郁焚所忽生靈芝三莖  
獲舍利百餘顆

無言和尚姓李滇人紹祖父精密教法常持一鉢鉢入定  
呪誦欲晴則鉢內火光燭天遂霽欲雨則鉢中白氣上  
天遂雨蒙氏封爲灌頂國師嘗於崇聖寺講經有老翁  
立聽畢乘風雲而去衆驚問之曰洱水龍也

因禪師微時嘗遇槌擊土次見一大塊賊槌猛擊之應手  
碎豁然大悟後爲老宿笑曰盡大地山河被因師一擊  
百碎

本行和尚不知何處人嘗示衆曰事從幽蓋合理因箭鋒  
枉若有人道得老僧分半院與住

廣顙屠兒一云廣目屠兒於涅槃會上放下屠刀立便成  
佛

惟實難湯氏別號徹杭之富春人四歲不語父喪忽謂母  
曰生鞠德重願歸佛以圖報於是出家從本宗禪師天  
寶中振錫于慈谿大蓬山麓廣德二年徙香山寺貞元  
二年坐逝建塔于寺巽隅葬焉咸通中忽逢人負漆器



五百事入寺曰湯和尚於浙西募緣先遣至此衆問其  
所在曰溪邊濯足衆趨而出惟見濡迹草徑直驅墳塔  
遺履在傍遂啓塔視之儼然如坐髮髻秀長遂出而奉  
之

遂端姓張氏慈谿人投師德潤寺日誦法華經至老不懈  
咸通十二年趺坐而化須臾口吐青蓮華七朵芬芳異  
常寔東山之下二十餘年塚屢發光衆開視之形質如  
生遂迎還寺潦飾奉之號青蓮法華尊者